



## 畢業季節

五月一過，鳳凰花淦淦仔開，漸漸染紅山頭。唧唧唧个蟬仔毋知屏在哪跡，嶄然好膽个啦，一隻開始叫，全部就像發癲樣仔跔等大大聲緊叫，滿山坪都聽得著，歸山壠應聲應到會震動。毋多知仔，學生仔畢業个季節到地。

七八十歲个老阿公、老阿婆，讀國民學校个印象應該係無鞋好著，愛行石頭路去讀書。領著畢業證書過後，伸幾個會去考初中，大部分个細佬仔就到田坵做事，細妹仔去躡裁縫車仔無就去學做頭那毛。想著愛畢業地，也就表示輕鬆个童年結束地，畢業典禮該時，大家人个目汁就落落跌哦！

五六十歲个阿伯、伯姆還細讀書時，係九年義務教育地，讀小學、國中个印象應該係蓋多外省先生，聽毋識佢等講个國語，淨記得校長同主任在升旗个時節會講盡久个話，企久地差一息就昏忒。領著畢業證書會暢壞哦，因爭做得去加工區上班，開始賺錢地，毋使過聽先生囉嗦地唷！

這滿畢業个學生仔，大體會繼續讀過高个學歷，過慢入社會食頭路。好个角度來看，係佢等學習个過程無斷忒；對壞个角度來看，後生仔無遽啊接手成為社會个生產者，勞動人力就會有斷層。毋管愛繼續讀書抑係愛尋頭路，應該愛認真恁想自家个未來，做一個有用个人。

第一個，愛學有興趣个技術。學有一項專長个技術就毋驚餓死，有興趣个事頭正做得久。趕後生學手藝，正毋會「老地正學吹笛，吹得會來鬚就白」。第二個，愛關心身邊个人同社會發生个事件。毋曉得運用智識來過日仔个學生仔，就像係蓋有學問个大戇牯，會分人噏講「掌一生牛，毋知牛尾向上抑向下」。包尾，愛有實現夢想个膽。正毋會「半夜想个千條路，天光本本賣豆腐」，確定自家个人生目標，煞猛向前行，改變、創新定著係清苦个事情，敢試看啊勝个人正有成功个機會。

這駁仔係各級學校辦畢業典禮个時節，領著畢業證書个畢業生，你，準備好地無？

作者：吳秀梅

### ☆詞彙學習☆

【淦淦仔】nem' nem' e'：滿滿的。

【屏】biang：躲藏。

【跔等】ten' den'：跟著。

【山壠】san' lag'：山谷。

【應聲】in sang'：共鳴。

【毋多知仔】m' do' di' e'：不知不覺的。

【躡裁縫車仔】nang cai' fung' ca' e'：意指去學做裁縫。

【落落跌】dab dab died'：不停的滴落下來。

【這駁仔】ia' bog' e'：這陣子。

### ☆文法學習☆

【試看啊勝】cii kon a siin：試試看。「V 動詞 + 看啊勝」表示嘗試做某個動作、某件事。

例 1：你鼻看啊勝，看這鑊飯有臭餿無。（你聞聞看，看這鍋飯有沒有餿掉。）

例 2：這臺電視係整看啊勝，係整毋著，就愛買過地。（這臺電視我試著修理看看，如果修不好，就要買過新的了。）